



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 8

PM-i Agniveers bo kum 21 asudang
anisungzudaktsuner: Sanjay Singh

Carlos Alcaraz Italian Open
nung masayatsü

VOL. XXI ISSUE NO. 202 (ADOK 202) DIMAPUR AMUNGNÜ (SUNDAY) MONUPII (MAY) 05, 2024 ₹ 5.00

Taoba PM Deve Gowda'er jabaso HD Revanna puogo



MLA HD Revanna

asoshi operation agia liasü, aser lai yakta SIT den jembitsü.

Tashiyim amshia pua bener aoba ken o ya tetsürlar jabaso-i benoka liasü, shiba Revanna'er kidang kum pongu jungnüa mapa inyaka arua liasü. Tetsü ya April 29 nü lar kidang nungi Revanna'er kinunger Satish Babanna-i pua bener ao ta lar jabaso ashia.

Iba anogo nungi tetsürla ya Rajashekhar-i Kalenalli, Hunsur taluk nung aliba farmhouse nung pua yua liasü.

Kasa mapang Prajwal Revanna-i anticipatory bail application agütsüba Bengaluru nung aliba People's Representative Court nung Justice Santosh Gajanana Bhat indang bench ajanga kasa anogo magizük. Prajwal ya tashiyim amshia tetsür balala den medemba maparen nung tai tonglokja lir.

HD Revanna aser par jabaso Prajwal Revanna nati tashiyim amshia tetsür balala den medem aser video tangoka liasü ta tai tonglokja lir.

Tebu aser jabaso anema ken o ya mezüing Hassan district kübok Holenarsipura police station nung taoba Deobarnü benoka liasü. Iba ken o ya Revanna'er kidang mapa inyaker tetsür kati ashishiba nung ajemdaker benoka liasü.

Bengaluru, Monupii/May 04 (Agencies): Karnataka sex scandal ken o nung tai tonglokja alisang JD(S) MLA HD Revanna Honibarnü Special Investigation Committee (SIT) ajanga puogo, shirnoki Revanna aser par jabaso Prajwal nati tetsür aika dak tashiyim amshi ta tai tonglokja aliba ken o bushir.

Mysuru abduction case nung HD Revanna-i anticipatory bail plea agütsüba Bengaluru court kati magizükba sülen pa apu.

SIT ajanga Revanna ya mezü tebu aser taoba ato kilonser Deve Gowda'er kidang apu aser CID office atongba sülen pa apuba sangdonga liasü.

Aji masudang tashiyim amshia pua bener aor ka Revanna den yariteper Rajasekhar'er indang Kalenahalli, Hunsur Taluk nung farmhouse nungi kumzuka liasü. SIT ajanga la kumzüksü

Manipur nung longkak aiter temi Kuki-Zo MLA indang effigies arong

Imphal, Monupii/May 04 (Agencies): Manipur nung kum ka shi office-i mao/mapa meinyaki sorkar senpong nungi sen crore aika agizüka agir Kuki-Zo nung MLA ter indang effigies rongdokja liasü.

Manipur nung kin balala tsüngra rara tenzüker kum ka ajungba anogomung Imphal East district kübok Pangei Yangong nung nung PYYDA, Thougei Pangei Yangdong, PYYDA, aser WWA Pangei densema lokti tentet balalai longkak aitba mapang parnok indang effigies (monü mesüra süjen amshia nisung mesüka yangluba) ya rongka liasü.

Iba sentong nung longkak aiter temi ashiba agi, item MLA ya tang tashi tajangzük ajak agir, aser state assembly secretariat nungi itemji agizüksü atema telok kata nung dena malirtem yoker, aser parnokji Imphal nung lendong timtem majurur.

Manipur nung May 3, 2023 nü Kuki aser Meitei nung ter tsünga azüdokshi tenzüka sülen assembly session anaben mena lir.

Züngsem 60 aliba Manipur Legislative Assembly nung Kuki-Zo MLA parnok ter (10) lir.

Item MLA ter prongi assembly

session nung shilem magi, saka sen jenti bendentsü asoshi yimya balala amshir.

Manipur Legislative Assembly (21st Amendment Act, 2020) nung züngsemtem indang itasen aser allowance ya ita shia sen lakh 2.5 lir.

Yangji itasen, constituency allowance, contingency allowance, entertainment allowance, telephone allowance, secretarial allowance, aser compensator allowance dena lir.

Iba den ano MLA tem ya Speaker-i melaba sorkar sentong balala nung linük tesem mashi nung oa adentsü atema allowance balaka agütsür aser iba atema financial year ka nung sen lakh 3 tashi agütsür.

Gari alitsü aser ki yanglutsü atema sen lakh 30 tashi loan agütsür.

Ano MLA shia computer assistants ana-na, personal assistant ka, aser PS/PRO ka-ka taa agütsür ayutsü melar aser item indang itasen ya sorkar senpong nungi agütsür.

Parnoki driver asem appoint süter aser par asem rongnung ka itasen 27,000 dak tema aser ana itasen 22,000 agütsür.

Manipur nung aliba MLA tem ya petrol aser diesel aser danga perks nung ita shia quota lir.

Ano MLA indang Local Area Development Fund kübok MLA shia financial year ka nung sen crore ana-na agütsür aser iba sen ya ozüing agi melaba ama par mulungba nung amshiter.

Kuki nung MLA ter ya Saikul A/C nungi Nemcha Kipgen, Tegnoupal A/C nungi Letpao Haokip, Saikul A/C nungi Kimneo Hangshing, Saitu A/C nungi Haokholet Kipgen, Tipaimukh A/C nungi Nguranglur Senate, Thanlon A/C nungi Vungzagin Valte, Henglep A/C nungi Letzamang Haokip, Churachandpur A/C nungi LM Khaute, Saikot A/C nungi Paolienlal Haokip aser Singhat AC nungi Chinlunthang Manlun lir aser state nung mepetmesü tenzüka sülen parnok Kuki nung asoshi administration balaka meshir.

Parnok rongnung Biren Singh-i aniba BJP sorkar nung Nemcha Kipgen aser Letpao Haokip ya minister lir, aser parnok indang itasen ya state sorkar indang GDA account nungi agizüker aser tanüingba züngsemtem itasen ya state assembly nungi agizüker.

Tamil Nadu Congress lenir ka ananü samar par farm nung tasü angu

Tirunelveli, Monupii/May 04 (Agencies): Tirunelveli East District Congress Committee tir KBK Jayakumar Dhanasingh, shiba tesüiba anogo ana samar bushia liasü, pa tasü mang Tamil Nadu Southern district kübok Karaichithupudur village nung par farm nung Honibarnü ngutetogo.

Uvari police ajanga Jayakumar indang temang ajanga rongsar farm nung jana bendenba tesem nung ngutet.

Jayakumar ya Brehostibar nikongdang par kidang nungi sama aser par jabaso J Karuthaiah Jefrin-i osang agütsüba sülen bushi tenzüka ta police-i ashir.

Osang ajanga ashiba agi, Jayakumar indang tetsüing-teben nung copper yinzü agi alena aliba ngutet aser pa tetsüing aser teka ya electric cables agi alener mi senloksü aser iba mapang electric

cables indang insulation yimsa ao südi ta police temi temulung melemi lir.

Police temi farm nung pa indang Voter ID aser Aadhar cards tema ngutet.

Jayakumar ya tepsetba sülen kuli raksatsütsü mechi temang nung mi senloksü südi ta police temi temulung melemi bilemer. Police temi suicide densema ano danga lenmangtem bushir.

Mkg. Police-i Kinünger yimtak ki arongba mapa nung mulung melemtetba nisung ka pua lir



Kinünger yimtak May 3 nü tenla kidang menden aser atem arongba noksa nungji angur.

Mokokchung, May/Monupii 3 (TYO): Kinünger yimtak May 3 anepdang 1:30 ako nungi 2:00 ako meta mapang kasa nungdang mi adoka ki ana arong, iba ki ana

arongba mapang nung tsük jen ka nunga mi aploka tsük jenja mitsü küma rongtok, ta May 4 nü Kinünger yimtak Riongsanger Putu menden council chairman

Wb. Imli ajurua jembidang ashia.

Ki arongba osangji angashia Chungtia yim nungi, Aliba yim nungi aser Sabangya Compound nungi nisung aika aruagi yaritepba ajanga miji kara remseptet aser iba den ano Mokokchung Fire station nungia gari ana aruagi yaritepba ajanga mi lendongji tuluka mataloki anenadok ta council chairman-isa ashia.

Mapang tatsüka lir kelen ano tenla kidang mi adokba osang angashia tenla kidang petrol bottle asem ngutet aser item asem rongnungjagi ka nungi mi adoka süngpak ka aser menden asem ta ronger liasü ta metetdaksü ta paisa shisem.

Council chairman-isa mapang kasa nungdang mi adoka ki ana aser tsük jen ka ta rongtokba den ano tenla kidang mi adok arongbaji süngmangseta yimdeni yimyim ayimoktsü aser yimtsüing telung aser temeket nung bushitsüingdangba mapang nung ano ki tazüing ka nung petrol bottle ana aser ano danga ki ka nung petrol bottle asem ta ngutetogo,

ki rongtokba ana aser petrol bottle anguba ki ta ki pezüprongji nisung maliba ki tesa liasü, item tatalokbatemji asadang dang iba mapa tamajung inyakerkem jagi Kinünger yim ya samatsütsü sentong aliba meteter ta ashia.

Ki pezü tashi rongtokba aser ano tsük jen rongtokbaji asadangra sen lakh 20 shi akoksaba asadangteter ta council chairman-isa tesasaba olen ka lemsatep.

May 3 nü iba lendong ataloker kelen District Administration aruagi Putu Yimsüsür den shisa lemsatepa asüingdangyaba mapang nung kishikinar yim shinga dena tsükchi mena ken o tamajung mali aser ano yimtelung nung yimer tsüingda nunga mangatetep mali, saka kum aika yim telung nung alir pi kin kari aiben dang yimdeni ashiba mangaba ajanga paji tapet senchi chia merenshir 2023 October ita nung yim nungi meindokba dak alaka danga ken o aser mapa tamajung kecha ataloka mali ta Council chairman-isa kuli

metetdakja liasü, ta lemsatep. Iba kirong lendong dak sentakba nung Kinünger yimdeni FIR ka zülua Mokokchung Police nem agütsüogo ta paisa shisem.

Kinünger Baptist Arogo Pastor Wb. Alemtemjen ajurua jembiba mapang, May 3 anogo iba kirong lendong ya atalok aser yimertem mulung mesüingjemteti aliba ajanga May 3 aonung nungi arogo nung revival akatsü aliba thitemogo, revival-jibo mapang tajung ka apir agitsü, saka tamanger yim ka ama aki ama tekülem sentepjibo amangbapurtem tanela nung tali dang akangshitsü asoshi agitsü ta metetdaksü.

Additional Superintendent of Police Mokokchung ajanga Kinünger yimtak ki arongba lendong dak sentakba mapang nung temulung melemtetba nisung ka Sattsü yim lushi nung puogo ta metetdaksü, saka iba nisungji shiba, kechi nisung ibajibo meshipok aser tang pa dang asüingdangyaba mapang agidagi ta metetdaksüogo.

Bengaluru nung Moatsü benjongmong amung



Tseminyu, Monupii/May 4 (TYO): Ao Senso Telongjem Bengaluru (ASTB) May 1, 2024 nü Moatsü nükjidong: "Telongjem nung tejakleni" ta asuba nung ajemtaker monga liasu.

Iba benjongmong nung tetushi tejaoker Wb. Bendangyanger Executive Director -BR innovations Pvt. Ltd. ajanga sobaliba yimya mesamadaksu-i wazuka ayutsu kanga tongtipang lir ta ashi aser

ano pei taso Lima nungi pilar liaka pei sobaliba aser yimsü yimpong nendaka benshiba tenungsang agutsu. Pai sa tetsurtemi mapa balala nung lokti den amalitepa aliba atema pelaba shisem.

Iba sendong nung tebur,tetsür aser tanur telok balalai sobaliba ken, ar atsütepba agi shilem agi.

Wb. Imli tzudir tir ASTB-i tarur pela agizuk . Moatsü ratet wb.Lima Aier treasurer-i

lemsatop aser wb.Nokin Jamir tezulur -i melepziung O jembia liasü .Ano, shilem agir ajunga nem Moatsü shijep den marok nung Moatsü salem ajenoker agütsü .Tatemsä Moatsü chiyong chiyonga liasü.

RSZ tenteter küm 9 ajungba anogomung den repsema 3buba general assembly agiogo



Tseminyu, Monupii/May 4 (TYO): Rengma Selo Zi (RSZ) tenteter küm 9 ajungba anogomung den repsema 3buba general assembly sentong Honibarnü Tseminyu district kübok KSU Ground, K Station nung agiogo. Iba sentong ya "Beyond us": Redefining our future" omen nung ajemdaker agia liasü.

Iba sentong nung MLA Jwenga Seb aser Director Higher Education Dr A. Nshoga na alakteta jaoker aser tetushi tejaoker liasü. Kasa mapang nung Angami Youth Organisation (AYO), Loth Youth Hoho (LYH) aser Sümi Youth Organisation (SYO) nungera mejeta jaoker liasü.

Sentong nung o jembiba mapang MLA Seb-i, RSZ tawabanga kübok Rengma nungertem küm ter shi telungjem aser temlungtetba tulu nung tejakdangi odar ta ashi.

District balaka khanga Tseminyu nungi Kohima tashi

kilometer 50 jajayonga aoba nungi tenzüka parnoki longjemmer inyakba ajanga Rengma nungertem tejangraba tanem tanemi atalokyonga odar ta pai ashi.

"Kümtem tsüngda RSZ ya timla ka, temelenshi tashi ka kümogo aser parnoki lokti terenlok aser temeden atema anibelem mesasai inyakdar," ta pai ashi.

Kasa mapang nung tetushi tejaoker Nshoga-i, Rengma nungertem sobaliba aser libaliro maitsü wazuka ayutsü aser ajungkettsü nükjidong nung iba lokti tentet aniba atema RSZ tir aser par team nem tenungsang agüja liasü.

Lenir anapronglai, tetsükdaksü balala ajangshia aoba mapang tezü madangtsü saka item tetsükdaksütem ya koktettsü atema tasü ita nokdaksü ajungshia liasü.

Kasa mapang nung committee secretary Zentilo Tep-i 2024-26 tenure atema RSZ team tasenba sangdonga

liasü, koba tir Kegwayhun Tep, general secretary Hiyalo Jemu (TSeophenyu Group) na lenisüba nung inyaksangshitsü. Tanga executives tem rongnung vice president Kisheto Kent aser Dithanglo Magh; joint secretaries Dr Dikhan Kath & Kechyesin Keppen; Andrew Kent - secretary finance; Kasihang Kath - secretary social & cultural; Mercy Kent & Loshüle Jishing - secretaries women affairs; T N David Magh - spokesperson aser David Kent - treasurer densema lir. Kenneth Kath, Kvulo Loring aser Dr Lolongchem Thyug nunger advisor ama shimogo.

Iba sentong ya Kegwayhun Tep lenisüba nung agi aser nungshilong sayatsüba sülen CRBC Executive Secretary Rev Haiwato Apon-i sarasadema liasü. Kasa mapang nung RSZ secretary women affairs Sinyhunle Tep-i tepela o jembia liasü.

Guwahati nung Tripura Sundari Express train nung ganja apu

Guwahati, Monupii/May 04 (Agencies): Government Railway Police (GRP) team kati Hokulbar nikongdang Guwahati nung aliba railway station nungi ganja aika den nisung ana apu.

It dangiterba osang kar nung ajemdaker GRP team yagi Hokulbar nikongdang 5:30 ako meta Guwahati Railway Station indang Platform No 2 nung anena aliba Train No 14620 (Tripura Sundari Express) indang Coach No H1 kanga junga meita ao.

Iba mapang temulung melemtetü nisung ana apu aser

parnoki marijuana (ganja) tuozük seret 89.1 nguteta liasü.

Maneni asüngdangyaba mapang nisung ana ya arishi küm 32 tain Yogesh Kumar aser arishi küm 25 tain Om Prakash aser tenaprong Bihar nung Madhubani district Narar yimtsüung nung alir ta jangjateta liasü.

Tenaprong train nung lia apu aser temesepba mozü ya talep tenet nung bona aliba apu.

Police temi asüngdangyaba mapang parnok ya Agartala, Tripura nungi Bihar leni aorba liasü ta ashi.

CHSS nungi HSLC & HSSLC topper tem nem tetushi agütsü



Dimapur, Monupii/May 4 (TYO): Christian Higher Secondary School, Dimapur nungi HSLC aser HSSLC 2024 Toppers tem nem school administration-i May 4 nü tetushi agütsüogo.

Tetushi agütsüba sentong ya Vice Principal Mrs Patricia Zhimomi lenisüba nung Covenant Hall nung agia liasü, kong topper tem, parnok tsürapurtem, administrative tekolaktem, tesayurtem aser class 10 aser 12 nungi kaketshirtemi shilem agia liasü.

HSLC topper tem rongnung Mhachilo Yanthan (1st Rank) aser Suruchi Bharti (8th Rank)

na densema lir aser HSSLC topper tem rongnung Tokali H Awomi (3rd Rank Arts), Maysha Pathan Khan (9th Rank Arts), Koyel Sutradhar (5th Rank Com.) nunger densema lir.

Sentong nung o jembiba mapang Principal S. Moatemsu Walling-i takok tajung angurtem nem tenungsang agütsü aser tang class 10 aser 12 nung zünga aliba kaketshirtem dang takok tajung angutsü atema meranga inyaksü ajungshia liasü.

Ellide Computers CEO Swapan Kumar Das-i, ITeS (HSLC&HSSLC) nung subject toppers tem nem laptop ka aser tablet ka agüja liasü.

AR-i sentong balala ayongzüka katsü

Dimapur, Monupii/May 4 (TYO): Assam Rifles-i May 4 nü Northfield School, Kohima nung kaketshirtem atema 'A Day with Coy Cdr' sentong ka ayongzüka katsüogo.

Iba sentong ya theme 'EMPOWERING YOUTH EMPOWERING NATION' omen nung ajemdaker agia liasü, kong Northfield school nungi tebur 45 aser tetsür 15 densema kaketshir 60 aser tesayur pezüü shilem agia liasü.

Iba sentong ya linük naklo ken atenba aser linük wako salaba sentong agia tenzüc aser iba sülen martyr Rifleman

(Late) T Gokil Singh, SM nursery nung süngtong atemba, self defence techniques sayauba, football asaya aser arr atsütepba tetoktepba, Kho Kho aser blind hit game amala asayatem aser Medical Officer temi taküm kümzüksü asoshi tasatem sayuba sentongtem agia liasü.

Iba sentong tajung ayongzüka katsüba atema kaketshir aser tesayurtemi AR dang kanga pelaba lemsatopogo. Iba sentong ajanga security forces aser nüburtem tsüngda tesendaktep tajungba kümdaktsüogo.

Kasa mapang nung Assam Rifles-i, Mon district kübok Phomching yimtsüung nung Medical Camp ka ayongzüka agia liasü.

Camp ajanga tebur 30, tetsür 89 aser tanur 38 densema ajak senteper yamdaklir 157 ajangzüko.

Maneni taküm libaliro, yiruyipong mapang anepalutsüba yimya densema General Medicines dak sendakba nung lecture ka agüja liasü. Iba camp ayongzüka katsüba atema Phomching nung alirtemi AR dang kanga pelaba lemsatopa liasü.



May 04, 2024 nü Palamu district nung Lok Sabha election nüboyim sentong ka nung BJP lenirtemi Ato kilonser Narendra Modi nem sempet ka agütsüdang tangokba noksa nung angur.

PM-i Agniveers bo küm 21 asüdang anisüngzükdaktsüner: Sanjay Singh

New Delhi, Monupii/May 04 (Agencies): Honibarnü Aam Aadmi Party (AAP) lenir aser MP, Sanjay Singh-i, Ato kilonser Narendra Modi-i arrshi küm 73 süaka tasembenbuba Ato kilonser inyaker, ajisüaka pai Agniveer sepaitembo arrshi küm 21 asüdang mapa nungi anisüngzükdaktsüner, ta aitsü. Sanjay Singh-isa Union home minister, Amit Shah'er jabaso, Jay Shah Board of Control for Cricket in India (BCCI) nung tongti inyakba ashishi. "Amit Shah'er jabasoi 'bat'-a koma amtsüar meteta lir ma?

Ajisüaka pa BCCI nung chairman inyaker. Ato kilonser Modi-i arrshi küm 73 nung tasembenbuba Ato kilonser inyaker, ajisüaka 'sepaitembo' arrshi küm 21 nung mapa nungi anisüngzüktsü. Ato kilonser Modi, Amit Shah aser BJP mapa mali saka parnoki par kibongtem aser medemertem jenjang tajungba akümtsü atema yarir," ta AAP MP-i ashi. "Parnoki linük rongsen parnok medemertem nem agütsür. Business inyakerterem dang sen 15 lakh crore sentsüh tokogo. Parnok dak ibaji keta lira onoki linük atema inyaker

saka parnoki par medemertem atema inyaker," ta pai aitsü. Hombarnü Congress lenir Rahul Gandhi-i, Indian Army temi Agnipath scheme maginüi liasü, iba ya Ato kilonser Narendra Modi-i apitetba lir aser iba scheme dak sendakba telemetba ajakji Prime Minister Office nung agir, ta metetdakja liasü. Lok Sabha election atema Congress manifesto nunga parnoki Agnipath Scheme agientsü aser Army, Navy aser Air Force sepaitem shimokba inyakyim akhi ama asütsü, ta nangzüka lir.

Sikh lenir Nijjar tepsetba ken o nung Canada-i India nunger asem apu

New Delhi, May 04 (Agencies): Homicide Investigation Team Superintendent, Mandeep Mooker-i, "Nisung tepsetba nung ya tangartemia shilem agia lir ta onoki meteta lir aser onoki item nisung ajakji apütsü atema inyaktü," ta metetdaktsü. Nijjar tepsetba ken o dak sendakba nung India aser Canada na tsüngda tesendaktep raksaa lir. Edmonton, Alberta nung arrshi küm 22 Karan Brar, Kamal Preet Singh (22) aser Karan Preet Singh (28) nunger parnok aliba kidang puogo. Nisung tepsetba aser nisung tepsettsü asalentong yangluba dak sendakba nung parnok anema ken o benokogo. Yaküm June ita nung Vancouver nung Gurudwara ka kima gari anenba tesem ka nung mejangjaba nisungtemi arrshi küm 45, Hardeep Singh Nijjar kaset. Pa ya Canada senso liasü aser Sikh nunger temeja lima 'Khalistan' atema takhangba agütsür lenir ka liasü. Yaküm September ita nung Canada Ato kilonser Justin Trudeau-i, Canada nunger senso Hardeep Singh Nijjar tepsetba nung India sorkari shilemagia lir, ta tai tongloktsüba sülen India aser Canada na tsüngda tesendaktep kanga mejungi raksa. Hokolbarnü osangbenertem den jembidang Integrated

Homicide Investigation Team Superintendent, Mandeep Mooker-i, "Nisung tepsetba nung ya tangartemia shilem agia lir ta onoki meteta lir aser onoki item nisung ajakji apütsü atema inyaktü," ta metetdaktsü. Canada nunger yimtenren lenir, Jagmeet Singh-ia, Canada nunger li nung Canada senso ka tekülemki aliba temeshi tesem ka nung tepsettsü atema India sorkari nisung tepsetertem 'hire' asü, ta aitsüogo. Canada nung New Democratic Party nungi Singh-i X ajanga, "Ni iba ya jangshitsüdi - India nunger agent mesüra sorkar den sendaktepa inyaker shirnoki nisung tepsettsü asalentong yanglu mesüra tetuyuba agütsüar jungkai adoktsütsüla aser Canada nunger ozüng kübok temerenshi agütsütsüla. Hardeep Singh Nijjar atema ochi temeden agütsütsüla," ta metetdaktsü. 2020 küm India-i Hardeep Singh Nijjar ya kiralongrar ka, ta sangdonga liasü. Khalistan movement ya India nung 1980s mapang tenzüka sülen Sikh nütsüng teimba aliba state- Punjab nung telungpur tebilemtsü adoka liasü, saka India nungbo ibaji nokdangtetogo. Ajisüaka Canada, Australia aser UK nung Sikh nungertemi maneni Khalistani atema takhangba agüja longkak aiter.

CBI-i Prajwal Revanna anema 'Blue Corner Notice' agütsütsü

New Delhi, May 04 (Agencies): Lok Sabha MP, Prajwal Revanna-i tetsür aika dak tashiyim amshi, ta pa anem tai tonglokja aliba ken o dak sendakba nung Honibarnü Karnataka chief minister, Siddaramaiah-i Special Investigation Team (SIT) ketdangsertem den senden ka menogo. Senden nungji SIT ketdangsertemi Chief Minister dang, CBI-i Hassan nungi Lok Sabha MP, Revanna anema "Blue Corner Notice" agütsütsü akok, ta metetdaktsü. CMO sangdong ajanga ashiba agi, SIT ketdangsertemi CM dang tim mera agia Revanna apütsü atema inyaktü aser bushisüngdangba maparen

kera inyaktü atema CBI-i Blue Corner Notice agütsütsü akok ta shiogo, ta metetdaktsü. SIT-i shidi ka ajanga CBI dang Revanna anema Blue Corner Notice agüjang ta mepishiogo. Iba notice ya international police-i agütsüba sülen nisungba maitsü, pa aliba tesem mesüra ozüng alema inyakba dak sendakba osangtem bendentsü. "Kodang CBI-i iba notice agütsüdir SIT-i Prajwal Revanna kong aliar iba osangji jangjatsü imlar, ta SIT ketdangsertemi shiogo," ta sangdong nung shia lir. Taoba mapang Ato kilonser, H D Deve Gowda'er semchir arrshi küm 33, Prajwal Revanna ya BJP-JD(S) teloktep nungi

Hassan Lok Sabha menden nung candidate lir. April 27 nü pai linük toktsür ao. Pa indang advocate-i pa SIT matsüngdangi arutsü atema anogo tenet meshi saka ibaji temzüng nung mali, ta shia magizük. Karnataka Chief Minister, Siddaramaiah-i ketdangsertem dang iba ken o nung zübazülema inyakra mesüra menora ibajibo magizüktetsü, ta shiogo. Paise, iba ken o nung shilem agia alirtem nem temerenshi tulu agütsütsü, ta metetdaktsü. "Prajwal Revanna tekeraba nung apütsü atema inyaktü. Iba ken o nung shilem agia alirtem nem temerenshi tulu agütsütsüla," ta chief minister-i metetdaktsü.



May 04, 2024 nü Agra nung Lok Sabha election atema nüboyim sentong ka nung BSP tongti lenir, Mayawati-i jembidang tangokba noksa nung angur.

Form No. 3 [See Regulation-15 (1)(a)]/16(3) DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati-781007 (Assam) Case No.: OA/50/2024 Iba Act nung section 19 kübok sub-section (4) nung ajemdaker jaoker, Debt Recovery Tribunal (Procedure) Rules, 1993 indang Rule 5 kübok sub-rule (2A) den azüngtsü akok. Exh. No.: 4244 STATE BANK OF INDIA -Vs- JUNIORS HUB & Ors To, (1) Juniors Hub Proprietorship Firm Naharbari Junction, Dimapur, Nagaland-797115 (2) Smt. Mereninla Proprietor of Juniors Hub, Daughter of Pangerwati Yaden, Wife of Dr. Aotoshi, House No. 70, Block B, Daroga Pathar, Dimapur, Nagaland-797115 (3) Dr. Aotoshi Son of Natrwar Thakkar, House No. 70, Block B, Daroga Pathar, Dimapur, Nagaland-797115 JAOKER 19.04.2024 anogo nung Hon'ble Presiding Officer/Registrar matsüngdang OA/50/2024 benoka liasü. Rs. 3291134.79/- sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/ notice agütsür (application den documents copies densema lir). Iba Act nung section 19 kübok sub-section (4) nung ajemdaker NA, defendants dang teküboklen aliba tetuyuba agütsür:- (i) Iba case defend asurtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaktsür; (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla; (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar; (iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla; (v) Ordinary business ajanga secured assets mesüra tanga assets aser kiojen nungi yokzüka senji security interest soita aliba bank mesüra financial institutions indang account nung deposit asütsüla. Nü dang tezüluba nung sangdong applicant nem agütsütsü tuyur aser 28.05.2024 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemetba agitsü. 23.04.2024 anogo nung tsünglanglen kü meyongnem den iba Tribunal indang seal agütsür: Registrar I/C Debts Recovery Tribunal, Guwahati



May 04, 2024 nü New Delhi nung Delhi BJP Tir, Virendra Sachdeva-i Congress lenir Arvinder Singh Lovely BJP nung agizükdang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, MAY (MONUPII) 05, 2024

Yisu ajuruba

Nisung balalai mapang balala nung yimya balala ajanga Yisu ajurur. Nisung kari bushia oa ajurur, nisung kar dangibo Yisu arur aser nisung karbo tangar ajanga ajurur. Aji oda, koba tia nung aser koba yimya nung ajurudir ajuruang, Yisu ajururtemji tia taka. Yisu ajuruba agi tasürtem shia arur, nükpokeri angur, tsüngsükeri jajateter, temenen tanüla agi pur kangshia alirtem salatsür aser shirangertem aneper. Yisu ajuruba agi temenen taidok angur aser teti atema Tsüngrem chir akümer. Aji oda, Yisui kümzüker ta asenok ajaki meteta lir. Ajisuaka, asenok dak tashimait kaji asenoki Yisu mebushir aser Yisui bushidanga asenoki Pa magizüker. Anungji ano, tangar ajanga Yisui asenok ya Pa dangi arudaktsüner saka asenoki iba taochi lenmangjia aiben mereprangteter. Aiben, tangar ajanga lenmang balala len nungi Yisui asenok ajar ser nung asenoki mangatetba ajanga Tsüngrem nungi taochi aser temoatsü magizükteti asenok temenen lar kümer shisaboluseta asenok alir. Tanü asenok den yangi kanga tesempatsü mapa inyaka senzüba temenen tsür kati tangar ajanga Yisu ajuruba otsü tejen ka lephsia lemsatepner. Laji Yohan tapu 8 nung shia aliba nüktapangtatsürla to lir. Anepdang yakta ka, Olive tenem nung tenla kidang Yisui nübotem dang sayutsüngia aliba mapang ka, Farisi aser Tezülurtemi nüktapangtatsürla ya nüktapangta benschia lia pur, laji Yisu dangi anir aru. Atangji, Farisi aser tezülurtemi nüktapangtatsürla Yisu dangi anir arubaji temenen taidok aser tekümtet agütsüdaktsünüa anir aruba masü. Parnok nükjidongjibo Yisu dak tai aputsü asoshi liasü. Ajisuaka, iba nüktapangtatsürla asoshibo Tsüngremer sentong balaka liasü. La nem taidok aser tekümtet agütsütsü asoshi Tsüngremi Farisi aser tezülurtem amshi. Iba anogo nung to la nüktapangtaya lia Farisi aser tezülurtemi mapu asünungbo, ano tang tashi Yisu majurui nüktapangta benschia senzüa lila ta kenkenbo temulung nung tipmedemi bilemer. La ya nüktapangtaya lia apu nungji, la den tebur ka dena liasü ta asenoki angateter. Ajisuaka, kechiba Farisi aser tezülurtemi kuli asütsü atema danga paji mapu aser kechiba tetsürla denji külemi Yisu dangi paji anir maru ta ano temulungjang nung tasüngdangba ka arur. Nüktapangta benschiba mapaji tebur atemabo tai masü saka tetsür atema dang tai asü ? ta asüngdangtsüsa adoker. Atangji, nüktapangtaba mapaji ajak atema tai saka iba anogo ya nüktapangtatsürla atema dang Yisui ajaba anogo ka asü südi. La pur Yisu dangi anir aodanga lai ola madok. Lai la medentsü memerang. Lai la temenen nempangtsü mebilem. Tanü tensa yimten mesüra lokti nung lenirtem kari tetsür ka tebur ka den nüktapangtaya ngur apu nungbo, ashiko tetsürla jagibo tebursangi tashiyim agi la raksatsütsü meranga liasü ta la temeden bushia nokdakla ta kenkenbo bilemer. Ibaji mesüka tangar ajanga Yisui kümzüksü ajar ser nung, asenoki asen tanurtem machimajemtsü chiajema lia tangari apudang asenoki parnok temeden indang jembir aser parnok apurtemjiang aitsür. Ibayongji, asenok tanurtem aser apuani aika Yisui buo ajurunüseta ajar ser nung asenoki nokdangba agi Pa majurutet aser taochi mengutet samadagi. Nüktapangtsürla nüktapangtaya lia apuba ama, asenoka aiben asenoki tai inyaka lia tangari jakdaka apur, saka asenoki tai menangzüker aser memelenshir, anungji Yisu majurur. Asenoki asenoksasa shitak inyaker asü tai inyaker-ar meteta dang lir, saka asenoki memelenshiteter. Iba ama mapang ka nung ajungbena ka tangar ajanga aseni Yisu ajurutsüsa tai benschia lia apur. Iba ama mapang nung tangar dang mejashii Yisu ajurutsüba mapang tajung ta bilema, ajemajema Yisu tsüngdang oa nokdakra, nüktapangtala dang ashi ama, Yisui asen maitsütsü. Pa tsüngdang taidok aser taochi angutsü aser tekümtet ngur pelashishia alitsü.

OLEMSABANG

Khristan-tem limapur sülen anidaktsü asü ? Mesüra limapurtemji Khristan yimsü dangi anir arutsü ?

~ L. Kika Pongener.

India nung Khristan teimtiba aliba State-ji Nagaland State asütsü. Assembly nung MLA roker (60) prongla Khristan temeja amenbaji Nagaland State asütsü. Anungji Naga lima yabo sorkar inyakyim ajak nung 'Temeruktiba linuk' (Cleanest State) ka asütsüba sernung...Tesasatsüka, State ajak rongnung 'Ochimashitiba linuk' (Most corrupted state) ka-ang litetba ya konang masü, saka maaksu tulu lir. Asen Naga nung yimsüsürtemi anir nutsüng-nubur ajungai Khristan ka ama lia mesayuteter. Taoba küm Nagaland aser Mizoram State nung Constituency kar nung Bye Election agiba mapang, deobar anogo nung Vote azüngtsü Election Commission-i anogo latet. Iba anema Mizoram sorkar-ibo deobar anogo nung Voteji mazüngtsü takangba agütsü, ibajagi Election Commission-i par state nungbo anogoji melenshi. Ajisuaka, Nagaland sorkar-ibo ola madoki tashi anga-a deobar anogo nung Vote-ji azüng...!!! Aji oda, Center sorkar nungi senotsü/terenlok mapa tangutsü tim shitak mangutsü tsübuba agi asü (?) Mesüra kechi küli agi ola madok'ar ashitsü makok...!!! Ano Hornbill Benjong nung küm kar nungbo deobar anogo denjir, anungji Khristan State ka ama benjong tialong nung suaka, deobar devotional sentep mapangbo, oda ghonda ka danga benjong sentongji anena atatsüla, saka yamaji meinyaktetba ngua kanga sasa-a bilemogo...!!!

Küm ishika tejaklen Naga nung yimsüsür (Politician) kati India nung yimsüsür tongtipang nisung (VIP) ka asüba (Dead) temang arongba mitsü/aut (Ashes) asen Naga lima-ia lemszüka bener aruba kanga bulua/ashishitepa jembiogo. Aji oda, ibajia kanga junga shisadanga, asen sobaliba aser tamangba yimsu den mapetba/meputepba mapa ka lir. Ajisuaka, ashiko, iba ama inyaka benschiba jagi Center sorkar nung tekolakpurtemji peladaktsütsü aser asenok tangutsü tim senotsü/terenlok mapa shitak angutsü...ta bilemba agi inyaka asü (?) Kechi tebilemba agi inyaka'ar nubur aika kanga sungmangogo...!!! Ano küm ishika tejaklen Naga-tsür kari Hindu nung 'Rakhi Bhandan' benjong nung...Army Personel kar dak 'Rakhi' mesuloktsüba Social Media nung ngur kanga bulua/ashishitepa jembiogo. Aji oda, Hindu nung tulurtem denji temba ayimba agi tajangzük kar angutsü tebilemba nung inyaka asü (?) Kechi tebilemba agi inyaka'ar nubur aika kanga sungmangogo...!!! Kechiyong ibaji asen sobaliba aser tamangba den mapetba/meputepba mapa ka lir. Ano taoba küm Hindu nung 'Ram Temple' yangludak North-east India nungi Khristan Politician-temi tenla (Donation) agütsüba osanga nguogo, ashiko, Naga nung Politician-tema karibo agütsür alitsüa akok...!!! Aji oda, Center sorkar nung tekolakpur kar peladaktsünudang aser parnok den tesendaktep tajung yanglunudang...Tsüngrem jashidakja Tsüngrem den tesendakdaktep raksara koda...!!! Tsüngrem dang nungi tongti-nisung (VVIP) aser sen-ang kibur kümdaktsür masü nooo...!!!

Hindu nungeri Diwali benjong nung kaket bomb kanga apoker aser ibaji par sobaliba aser tamangba yimsu den sendaktepa lir. Tanü putu nung asen Naga nung Khristan-temi ibaji jilo ajizüka, 'Christmas' aser 'Newyear' benjong nung kaket bomb kanga pokteper. Ajisuaka, ibaji asen sobaliba aser tamangba yimsu den mapetba mapa ka lir. Taoba ita nungang Hindu nung 'Holi' benjong mongogo, ashiko, iba benjong nung-to asen Naga nungera karbo, Hindu nung tembartem den külemi Holi benjongji mongogo sudi...Shitak asü masü'ar Aor Tsüngrem lar, laishir takotet, lennir tajung kibong ka...Iba Holi benjong nung Hindu nung den rong teploktepa amongba...Social Media nung prokshiba ngua tamanger aika kanga aoksaogo...!!! Aji oda, benjong-bentsü ajak ya tamangba yimsu/sobaliba den sendaktepa lir. Aor 'Moatsü' aser 'Tsüngrem-mong' benjong ya-a sobaliba, tamangba aser külem-küja den sendaktepa lir. Aji oda, asenoki Hindu yimsuji agizüka mamang-aka, kodang par sobaliba aser tamang yimsu den sentaktepa aliba mapatem inyaka benschidir, asenoka parnok den sungra aputeper akümer. Atangji, asenoki limapur tamang yimsu aser sobaliba dak sendakba mapatem inyaka benschiba angudangji, asenokji tangar asoshi temettsüdaktsü lung ka akümer...Anungji asenokji tangar asoshi temettsüdaktsü lung ka masütsüla.

Anungji Khristan tajung ka ama kechisarena ajak nung asüngteta alitsü kanga tongtipang lir. Asenokji tangar asoshi tatishitsü tajung, taküm küli tajung akaba taküm ka-ka asütsü kanga tongtipang lir. Tsüngrem oi ashir..."Yamaji nisungtemi nenok mapa tajung ngua Kodak nung aliba nenok Tebu sentsüwangshidaktsütsü asoshi parnok (Mamanger) madang nenok tesangwaji jungkai adokdakjang" (Mathi-5:16). Asenok Khristan tajung ka ama mamanger den sungra maputepi asüngteta alitsü aser amangtsü kanga-sa tongtipang lir. Tsüngrem oi ashir..."Mamangertem den sungra küsa nung teputep, kechiyong Temeshibaji temenen den kechi nung puteptet ? Tesangwaji amang den kechi nung puteptet ? Aser Khrista-ji mojing den kechi telongjem aka ? Tamanger kaji mamanger den kechi shilem aka ? "Anungji parnok rongnungi adoka balaka liang ta Kibubai ashir" (2 Korint-6:14-17). Asenok Khristan tajung ka ama, nisung peladaktsür masü, saka Tsüngrem peladaktsür taküm ka-ka asütsüla. Tsüngrem oi ashir..."Kechiyong ni nisung mulong chidaktsüsu bushir asü ? Mesüra Tsüngrem ? Mesüra ni nisung peladaktsütsü meranger ama ? Ni nisung peladaktsüra ni Khrista lar masü" (Galatia-1:10).

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Tennessee nung kaketshir noklang aikati Yisu Khrista



Tan hopta Tennessee nung ayongzükba Unite US sentong nung kaketshirtem baptidang tangokba noksa nung angur.

May 04, 2024: Yaküm Auburn University campus nung tanela asentenshi milak tuluka jangruba sülen maneni university campus pezü nunga asentenshi milak jangrua kaketshir meyrjang aikati Yisu Khrista agizükogo.

Yaküm September ita nung Auburn University indang Neville Arena nung Unite US sentong tenzuka liasü aser iba sentong nungji kaketshir 5,000 aden aser nisung 200 shi baptia liasü. Iba mapang nungjagi tenzuka Unite US-i Florida State University, University of Georgia, University of Alabama aser University of Tennessee nunga item sentong ayongzükaga agi.

Iba sentong ayongzükertemi local Arogotem den longiemer item sentong ayongzükaga agir.

Tan hopta nunga Tennessee nung ayongzükba Unite US sentong nung kaketshir 5,000 shi adenba sülen nisung noklang aikati Khrista agizük aser nisung 120 dak tema baptiogo.

Unite US-i Instagram account ajanga, "Linük tesem ajaklen college campus balala nung Tsüngremi mapa tulu inyakdar, aser tarutsü nunga maneni Tsüngremi mapa

inyaktsü onoki imlar," ta metetdaksü.

Osangbener den jembidang Unite US tentetsang, Tonya Prewett-i, "Item ajak ya Tsüngrem arakzuba lir. Ni iba ya inyaktsü makok, onoki inyaktsü makok, saka Tsüngrem teka agi inyakba lir. Pa lenmangji asenok dang nungi tuluba," ta ashi.

Laisa, kaketshir meyrjang aikati pei melungjang Yisu Khrista nem bendanga agütsüba lai kulisüa nguogo, ta metetdaksü.

"Nisung 800 dak tema baptiogo. Onok ya tashi angartem dang lir. Tsüngrem onok jakdang ogo aser Pai tesüngmangtsü lenmang balala ajanga inyaker," ta laisa metetdaksü.

Unite US sentong shiaji tongtibang nükjidong asem lir; mezüngbubaji tekümtet, tanabubaji temenen aser khuret nungi nüchiso anguba aser tasembubaji local Arogotem aser ministries ajanga kaketshirtem nütsüngsütsü atema lir.

Tan hopta Tennessee nung agiba Unite US sentong nung Passion Music-i ken aten aser

Tsüngrem o jembir anaji Waco, Texas nung aliba Harris Creek Baptist Arogo nungi Jonathan Pokluda aser IF:Gathering tentetla, Jennie Allen na liasü.

Osangbener den jembidang Tonya Prewett-i, "Onoki local Arogotem nung pastor tem aser campus ministry nung lenirtem den tongtepratepa sendakteper aser onoki parnok ayongsemba sülen parnoki item sentong atema sabang renemtsür. Ibaji ajanga kaketshirtemi item sentongtem nung shilem agiteter," ta ashi.

Laisa, "Kaketshirtem aikati parnok Arogotem nung züsemba kuli süogo aser tangbo parnoki pei Arogotem nung tenzük mesüra small groups mesüra discipleship programs nung shilem agir. Iba ya tesüngmangtsüka lir," ta metetdaksü.

Tsüngremi college campus aika nung mapa inyakdar, ta lai ashi.

"Ni ainkar ka masü saka iba sentong ya ajanga asentenshi tulu adoktsü ta Tsüngremi kü dang lenmang sayu ama ni bilemer. Iba ya asen linük nung kodanga majangshiba ka asütsü," ta laisa shisem.

ANOGO ABEN TSÜNGREM DEN


TAKOKBA SARASADEM

Aser kodang Danieli tezüluba nungji tenüng züluogo ta metet, pai pei kidangi ai; ...aser pai anogo nung asemben temokok agi apudak, aser sarasadem, aser pai mezüng inyakba ama pa Tsüngrem madang tenüng asang. Daniel 6:10

Tamangba yimsü ajak nung sarasademba ya kanga dang tongtipang kechiaser iba ya pei Tsüngrem dang taochi aser temoatsü meshiba mapang lir. Asenok khristan ka asoshi asen Teyanglur Tsüngrem tenüng sanga pa dang asen nüngdaktem shia sarasademba ajanga asen mulung anisüngzükba dang masü iba nung tajangzük aika angur. Osang Tajung ken nung Takokba Sarasadem indang aseni atenba ama, asen taküm teti Tsüngrem O nung tera yanga takokba sarasadem asen sobutsü kuma sobur Tsüngrem den tejak leni meradi.

Khristan kati sarasademji asen sobutsü asütsü kanga tongtipang. Asenok aiben tamakok aluba, atsüngzükaga aoba temenen yimya balala nung asongba ya sarasadem nung tashi maitba ajanga lir, kechiaser aseni manen sarasademra temenen mojingi ajener. Asenoki ya metet sarasademi sendakteper, teimla agütsür, temenen lenman paidoker, tanüptsü angur aser takokba agütsür. Tamang ka ama, sarasadem koba nung tashi tulu lir iba ajangshitsü aser kuli sütettsüsa maneni sarasadem ajanga takok anguba taküm aser kibong südi.

Kaduna State nung Pastor ka Arogo mungdangi aoba mapang khaset



Rev. Manasseh Ibrahim

May 04, 2024: Mongolbarnü Nigeria sorkari kecha (April 23) Nigeria kübok Kaduna state nung Rev. Manasseh Ibrahim Arogo mungdang ka nung adentsü aoba mapang lenmang tom nung auer telok kati pa khasetogo, ta International Christian Concern (ICC)-i metetdaksü.

Rev. Ibrahim ya Evangelical Church Winning All (ECWA) Kaduna Central District Church nung inyaka liasü. Kaduna state nung Khristantem anema inyakba tatalokba balala nung Khristan meyrjang aika süogo aser tamangertem aika tetsübu nung dang alir.

Christian Association of Nigeria (CAN) nung local chairman, Yahaya Kinge-i, "Kaduna state nung auer telok balala aser telungpurtem rara ajanga Khristantem kanga takoksa angur. Khristan jenti tepsetba nokdangtsü atema

Nigeria sorkari kecha meinyaktetba ajanga Khristantem laktetogo," ta metetdaksü.

Tesüiba küm 10 tsüngda Northern Nigeria nung Boko Haram aser Islamic State West Africa Province (ISWAP) ama kiralongrar teloktem aser Islamic Fulani telungpurtemi Khristan meyrjang aika tepsetogo aser aika puer ogo.

2022 küm tatembanglen nungi tenzuka 2023 küm tatembanglen tashi nung Nigeria nung Khristan 4,118 tepsetogo aser Khristan 3,300 dak tema puer ogo, ta Open Doors' World Watch List report ajanga metetdaksü.

Nigeria nung kiralongrartem aser auertemi Khristantem amakba aser tekülem kitem raksatsüba mapang nung police-i repranga dang toktsür, ta International Christian Concern (ICC)-i metetdaksü.

Philippines nung Khristan putirtemi tzünglu arudakjang ta sarasadem

May 04, 2024: Tang Philippines nung kanga tatsük agi nüburttem kanga timtemba mapang nung linük nung Khristantem putirtemi tsüngsang-mopung tajungba akümtsü atema sarasademba den külemi Arogotem dang tzünglu ardakjang ta sarasademtsü ayongzükogo.

Philippines nung kanga tasük den külemi light junga maruba agi school meyrjang aika shibangadokogo.

Taküm küm tenzükertem tzünglu khen danga maruba agi alu nunga sen million 276 shi jennjang tsünüsempontsü

takoksa nguogo, ta Department of Agriculture-i metetdaksü.

Philippines nung Catholic Khristan putirtemi linük tesem ajaklen Arogotem nung tekülem sentong agidang tzünglu arutsü aser tsüngsang-mopung tajungba akümtsü atema sarasademang, ta mepisha metetdaksüogo.

May 4, 2024 nü Khristan lenirtemi Arogotem dang yamai sarasademtsü metetdaksü- "Onoki Nü dang tang mapang ner nüburttem timtemba nungi anisüngzüktsü atema kanga tatsük

agentsü mepishir. Tzü agi anüngba nungi anisüngzük angutsü, alu nung tzü mesüoktsü, light power adokdaksütsü aser anogo-aben onok nüngdak balala atema tzünglu yokang, ta onoki sarasadem."

April 27 nü Manila nungbo temperature 38.8 degrees Celsius tashi atuba ajanga anogo ananü atema school 47,000 dak atema shibanga liasü.

May 3 nunga school 8,000 jungnua shibanga liasü aser tatsük mesüngjemra maneni school tem shibangtsü, ta school education department-i metetdaksüogo.

AO OSHI ANGAZÜKDAK: TANÜ ANGAZÜKTSÜBA OJANG



Süngmang

(n) Süng tulu ali nung mepitaka ayuba, süng temang (huge tree lying on the ground)

* Arem nung süngmang tulu ajanga mouteti timatemer.

Süngmang

(adv) tebangkatsü, meimlaba ka (surprise)

* Asenok yimya ngur tangartem kanga süngmang.

OLONG PAITEP # 6777

Grid for OLONG PAITEP # 6777 with numbers 1-17 in various positions.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizingdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6776 TELANGZÜBA

TIPIEN :

- 1. Zütsük. 3. Azü, 5. Omen, 6. Anük, 8. Liijaba, 11. Amtsük, 14. Tanü, 15. sati, 16. Ako, 17. Tzusen.

LANGTSÜNGLEN :

- 1. Zütsüra, 2. Semki, 4. Zünga, 7. Tir, 9. Anüolen, 10. Rür, 12. Tanük, 13. Watsü.

NAI-A YA METETTER MA

INDIA NUNG 2024 KÜM TIMTIBA AYOKBA GARI:

- 1. Tata Punch
2. Hyundai Creta
3. Maruti Suzuki Wagon R
4. Maruti Suzuki Dzire
5. Maruti Suzuki Swift
6. Maruti Suzuki Baleno
7. Mahindra Scorpio
8. Maruti Suzuki Ertiga
9. Maruti Suzuki Brezza
10. Tata Nexon



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

ASDC-i Chakma-Hajong ken o süoki ia agir



Diphu, Monupii/May 4 (Agencies): Autonomous State Demand Committee (ASDC)-i, Chakma-Hajong refugee tem Arunachal Pradesh nungi anir arua Assam nung lidaktsütsü atema benokdangba indang süoki ia bilemba lemsatepogo.

ASDC-i, Arunachal Pradesh nungi Chakma-Hajong refugee tem Assam nung amenokdaksüra Karbi Anglong district nung demographic melenshitsü akok, ta ashi.

ASDC general secretary aser Diphu Lok Sabha constituency indang candidate Jotson Bey-i ashiba agi, Chakma-Hajong refugee tem

Arunachal nungi anir arua Assam nung amenokdaksütsü atema Assam chief minister Himanta Biswa Sarma den sensak asemba indang union minister Kiren Rijiju-i metetdaksüo.

"Parliamentary election magi tsüingda ASDC-i ozüng alema arur alirtem meyipa yoktsü atema Assam CM den sensaksemogo," ta Jotson Bey-i ashi.

Paisa, "scheduled tribes atema mekazükja tokja aliba Sixth Schedule district, Karbi Anglong nung tangalen nungi arua melidaktsütsü ta onoki amanger aser tang ozüng alema arur alirtema anintsüla," ta ashi.

Bey-i, Chakma-Hajong nunger refugee lakh pong Assam nung jenokdaksüra iba ajanga mepetmesü adoktsü akok ta ashi.

ASDC, den KSA aser Karbi Nimso Chingthur Asong (KNCA) nungeri Arunachal Pradesh nung aliba Chakma-Hajong refugee tem Assam nung lidaktsütsü atema benokba ya magizüker, ta Bey-i ashi.

Tanga Karbi Anglong district kübok Borlangpher tesem nung Chakma nungertem jenoka aliba indang jembiba mapang Bey-i, 1951 küm sülen district-i arurtem lispor ama mezüngshitsü aser parnok meyipa yoktsüla, ta ashi.

Shillong nung FR camera 300 amenoktsü

Shillong, Monupii/May 4 (Agencies): Meghalaya sorkari Shillong yimti nung surveillance jenjang ajungketsü atema facial recognition technology keta aliba camera 300 shi amenoktsü sentong yangluogo.

Meghalaya chief minister Conrad Sangma-i ashiba agi, iba inyakyim ya smart city project nung shilem ka lir, aser Shillong nung ozüng alema inyaksangshirtem inyakyim nokdangtsü aser nüburtem kümzüka toktsütsü atema lir.

Integrated Control and

Command Centre (ICCC) ka amenoktsü atema sen crore 150 lemozüktsüo, ta Meghalaya CM Conrad Sangma-i ashiba den inyakyim tenzükogo, ta shisem.

Paisa, yimti ajunga nung tongtibang junction tem nung advanced facial recognition software keta aliba jenjang tajung camera 300 shi amenoktsü, ta ashi.

Meghalaya chief minister-isa, integrated command centre koba July ita lapoktsü sentong lir iba ya mapang shitak nung lapoktetsü imlaba lemsatep.

Maneni pai, camera network atsülangshiba ajanga nüburtem nem surveillance kübok aliba indang awareness agütsütsü, ta ashi.

Shillong yimti nung iba inyakyim benokba ajanga ozüng alema inyaksangshirtem inyakyim nokdangtsü akoktsü ta temulung lemaba bilemba CM-isa lemsatepogo.

Temetetsükaji Meghalaya aser talisa Shillong yimti nung tawa petrol bomb agi tesem balala amakba tali küma odar.

Assam Rifles-i ULFA-I den sendaktepa alir kar puogo

Guwahati, Monupii/May 4 (Agencies): Assam Rifles-i Honibarnü United Liberation Front of Asom-Independent (ULFA-I) den sendaktepa alitsü akok ta temulung melemi bilemba nisung asem sota yuogo.

Osang ajanga ashiba agi, item nisungtem ya iba tenokdangba agütsür aliba

telok nem meima senotsü teyari agütsüba inyakyim nung densema lir.

Assam Rifles-i item temulung melemi bilemertem ya Arunachal Pradesh kübok Kanubari tesem nung apu, aser ken o maneni bushisüngdangtsü atema Assam kübok Sonari nung police nem bendanga

agütsüo.

AR-i sota alirtem ya Sonari kübok Teokghat Aideobari Bagisa Gaon nung alir Sanjay Dey aser par jabaso Sujit Dey aser Nagaland kübok Nokjaan yimtsüng nungi Tajabang Konyak ta jangaogo.

Parnok ya police ket nung tang ken o ashishiba mapang lir.



Imphal: Manipur nung kin ana tsüingda mangatettep adokba sülen küm ka ajungba anogo central aser state force tem longjemer tesem kar meita aoba mapang prangbong injang aika ngutetogo. Kangpokpi district kong Kuki nunger timba alir iba district kübok Nakhujang hill range nung sepaitemi carbine machine gun ka den magazine, 9mm pistols ana den magazine, HE-36 hand grenades ana, IED (500gm) ka aser injang 16 nguteta liasü.

DR Congo anüdoklen displacement camps nung bomb pokloktsü



Democratic Republic of the Congo nung North Kivu province kübok Goma yimti tezülen camp ka nung bomb pokloktsüba sülen nüburttem adenshia aliba noksa nung angur.

Goma, Monupii/May 04

(Agencies): Democratic Republic of the Congo anüdoklen tesem balala nungi nüburttem adenshia jenoka aliba camp ana nung bomb ana apokba lendong nung tanur densema nisung 12 asü, ta sorkar ketdangsür, United Nations aser aid group ajanga ashir.

North Kivu province indang yimtiba Goma anasa Lac Vert aser Mugunga nung aliba camp tem nung tenük yoker Hokolbarnü bomb ya pokloktsü, ta UN-i sangdong ka nung ashi.

Iba lendong nung nisung 20 shi yiru, aser ibai human rights aser international humanitarian law anema inyakba lir aser war crime asütsü, ta ashi.

Süki nung nisungtem mejanga alidang iba lendong ya atalok, ta yangji alir kati ashi.

Congolese military aser United States-i kidanger Rwanda nung aliba mitkar aser M23 rebel group tenüing asener.

Ajisüaka US-i aitsüba ya temenünütsü mapa lir ta

Rwanda-i Honibarnü ashi. Rwanda Defence Force (RDF) ya "professional army" lir aser timtem balala mechi pei ki yutsür arua jenoka aliba tesem nung kodanga mamaktsü, ta sorkar odongtar Yolande Makolo-i ashi. X nung post ka nung Makolo-i Congolese military ajanga yariba militias tenüing asen.

Tamalen DRC ajanga Rwanda army positions maka nok-nü aser injang-bomb raksatsüba mechi tayang kepzüka lir, ta iba region nung DRC indang army odongtar Lieutenant-Colonel Guillaume Njike Kaiko-i ashi.

Social media post ka nung sorkar odongtar Patrick Muyaya-ia M23 tenüing asen, shirnoki tesüiba küm ana tsüingta North Kivu nung alinük tuluka agia lir.

Mines aser ali rongsen azüoktsü mechi Rwanda-i iba telok ya yarir, ta DRC, UN aser anüolen linük temi ashir, saka Rwanda-i magizüker.

Injang-bomb ya M23 kübok

aliba tesemlen nungi khaloktsü, ta osangbener kati ashi.

Iba telok yagia shilem magi ta ashi aser DRC sepaitem tenüing asen.

DRC anüdoklen rara tuluba akumba ajanga civilian meyerijang aika Goma tsütsü temeket nung aliba jila leni jena ao, koba Lake Kivu aser Rwandan arütsü tsüingta lir.

Tir Felix Tshisekedi ya Europe nung senzua liasü, saka iba lendong atalokba sülen Hokolbarnü kidangi meyiba arutsü telemteba agi, ta pa indang office ajanga sangdong ka nung ashi.

Rwanda-i M23 telok yaria DRC tensa tamajungba kumdaktsür, ta Tshisekedi-i mapang talangka nungi tai tonglokja arur.

Tan hopta iba telok yagi tongtipang Rubaya jila amokbanga liasü. Iba jila nung tantalum jenti lir, koba coltan nungi agizüker aser smartphones yangluba nung amshiba oset tongtipang ka lir.

Northeast Nigeria nung measles pokteta lir, nisung 42 süogo

Abuja, Monupii/May 04 (Agencies): Nigeria northeast tsütsü Adamawa state nung measles pokteter hopta ka dak tema arudang nisung 42 süogo, ta state indang health commissioner-i ashir.

Iba tashidak yagi local government area ana nung tali kongshi, kong nisung 200 jungnüa dak iba tashidak keta alitsü südi ta temulung melemteti lir, ta Felix Tangwami-i Hokolbarnü ashi.

"Item tesem temi measles vaccines tem yokogo aser field teams temi tensa azüoktsü meranger," ta pai osangbener dang ashi.

Measles ya kanga zübaa menatepa aor aser mopung nung jajaba virus ka lir aser arishi küm pongu tekübok tila tanurtem dak tali kongshir. Iba tashidak wara ya vaccine dose ana agiba ajanga nokdang.

Iba tashidak tenzükdang temang metar, aketer aser neptzü ayimer. Iba yagi temang sünga ara adokdaktsür.

2000 küm nungi vaccinations ajanga nisung million 50 dak tema measles agi takum samatsütsü aliba nungi jenbuogo, ta World Health Organization ajanga ashi.

Nigeria north tsütsü tensa majungba ajanga vaccination campaigns nung tetsükdaktsü ajurur aser talisa tila tanurtem iba tashidak menatsüsa tia nung yutsür.

2009 küm nungi tenzüka Boko Haram telungpur teloki Nigeria amak tenzüka sülen nisung million ana dak tema pei ki yutsür tesem balala nung jenoka lir, aser alima nung humanitarian crisis tamajungtiba tenzüksü

jenjang ka nung lir. Ano mapa tamajung inyakba telok balalai Nigeria northwest tsütsü security nung timtem tali agütsür.

Ano COVID-19 pandemic ajanga health system aser vaccination sentongtem nunga tetsükdaktsü agütsü, ta Doctors Without Borders ajanga ashir.

Measles azüoktsü asoshi vaccination shilem 95 nüngdaka aliba magütsütetba yong taoba küm iba virus agi nisung aika dak kongshi, ta Doctors Without Borders ajanga küm tetenzüklen shia liasü.

October aser December tsüingta measles agi meneper nisung 3,956 anepalua liasü, ta parnoki ashi.

Iba virus ya vaccine magi aliba tila-tanurtem dak kanga kera menatepa aor.

Nijjar tepsetertem Pakistan nung ISI den tesendaktep lir

Ottawa, Monupii/May 04

(Agencies): Taoba küm June ita Khalistani separatist lenir Hardeep Singh Nijjar tepsetba ken o nung shilem agiba nung tai tonglokja Royal Canadian Mounted Police (RCMP) ajanga nisung asem noksa sayaogo.

Canada indang British Columbia province Surrey yimti nung aliba gurdwara nung gari anena ayukdak tesem nung Canadian senso aser Khalistani lenir Nijjar tepseter ya Kamalpreet Singh, Karanpreet Singh aser Goldy Brar nungertem alitsü ta RCMP ajanga tenüing metetdaksüba sülen Hokolbarnü sangdong ka agütsü.

"June 18, 2023 nü Hardeep Singh Nijjar tepsetba nung shilem agir nisung asem apuba tanü Integrated Homicide Investigative Team (IHIT) aser Federal Policing Program Pacific Region ajanga sangdongogo," ta Duheme-i sangdong ka nung ashi.

"Ghonda zünger mezüngmai bushisüingdang mapa meinyaki aser amalitep makai item amala nisung meputeter," ta pai ashi.

Ano Canadian broadcaster CBC ajanga osang ka agütsüba nung, pua aliba nisung asem ya 'hit squad' nung shilem ka liasü aser tesüiba ita ishika Canadian ketdangsür temi parnok dak tenük yoker aru, ta ashi.

Iba inyakyim meteta aliba Indian ketdangsürtemi ashiba agi, tai tonglokja alir par asem ya Canada nung alir aser temesepba mozü shibelenba nung dena lir aser Pakistan spy agency Inter-Services Intelligence (ISI) den sendaktepa lir.

"Gangsters tem Canada nung mener India nung operations agir aser National Investigation Agency (NIA) ajanga tai tongloktsür aika yangji alir. India anema aser pro-Khalistani mapa inyakba atema ISI nungi parnok teti sen angur. Mapang shia onoki kuli agüja aru saka Canada sorkar mesüra par police nungi teyari mali," ta ketdangsür yagi ashi.

"Iba ken o ya Canadian police atema lir aser kuli makai parnoki Indian sorkar tenüing asener," ta parnokisa ashi.

Separatist lenir asüba indang ken o bushisüingdang tesüdak lir aser iba bushisüingdang den ano danga ken o kar dena lir, ta Duheme-i ashi.

Nijjar asüba aser Canada Ato Kilonser Justin Trudeau-i India shilem lir ta tai tongloktsüba ajanga Ottawa aser New Delhi tsüingta tesendaktep kanga mejungi akum. India-i item taitüsüba ya tamendak dak maka ta ashi aser Canada ketdangsür nungi kuli meshia liasü.

Nijjar ken o nung par asem anema nisung tepsetba aser nisung tepsettsü tasa yangluba ken o benokogo, ta Canadian ketdangsürtemi ashir.

Iba ken o bushisüingdang asüsang Integrated Homicide Investigation Team (IHIT) indang officer-in-charge Mandeep Mooker-i ashiba agi, Surrey RCMP aser par teloki tesüiba ita ter tashi British Columbia nung Surrey kübok 7050 120 Street nung Guru Nanak Sikh Gurdwara kima arishi küm 45 tain Hardeep Singh Nijjar ya shiba ta jangjatetsü meranga mapa inyaka aru.

South Sulawesi nung anentsüh aser tüzümsüing agi nisung 15 asü

Jakarta, Monupii/May 04

(Agencies): Indonesia indang South Sulawesi province nung tzünglu kanga sashia aruba ajanga anentsüh alua tüzümsüing adoka ki aika nungzüka bener ao aser lenmangtem raksaja nisung 15 asü, ta linük indang disaster management agency ajanga ashi.

Meyi mapang Indonesia nung anentsüh kanga bolua alir, koba January ita nungi tenzüker, aser tesem kar nung arem chidokba ajanga tebilemtsü tuluba akumer aser mapang talanglang tzünglu aruba ajanga tüzümsüing adoker. Indonesia ya asetkong 17,000 agi akumba lir.

Hokolbarnü South Sulawesi kübok Luwu regency nung anentsüh alua liasü, ta Indonesia indang disaster mitigation agency (BNPB) indang odongtar Abdul Muhari-i Honibarnü sangdong ka nung ashi.

"Luwu regency nung tüzümsüing aser anentsüh ajanga nisung 14 asü," ta pai ashi.

Ano South Sulawesi nungsa

tesem ka nung nisung ka asü aser ana yiru, ta Abdul-i ashi.

Nisung aliba ki 100 dak tema kanga sashia raksa, ki 42 anenzüker ao aser lenmang pezü aser apu ka raksa ta BNPB ajanga ashi.

Nisung 115 shi mosques mesüra kinunger kidangi anir ogo aser kibong 1,300 dak tema iba timtem agi kongshia lir aser parnok ketdangsürtemi anizüker aotsü meranger.

Tang meyi mapang Indonesia nung tzüngsang-mopung kanga mejungi arur aser ibai talisa tüzü-mopung melenba ajanga alitsü südi ta ashir.

March ita Sumatra asetkong nung ajungben tüzümsüing adoka anentsüh aluba nung nisung 30 shi asü.

Tawa Indonesia nung yimti aika nung kanga atsükba osang lir, saka temperature tali akumba ya tang Southeast Asian region timba nung kongshia aliba heatwaves ya masü ta Indonesia indang tzüngsang-mopung takzür BMKG ajanga ashi.

Carlos Alcaraz Italian Open nung masayatsü Euro 2024 atema squad nung asayar 26 melatsü



Carlos Alcaraz

Monupii/May 4, 2024 (Agencies): World number three asayar Carlos Alcaraz-i taruba hopta asayatsü aliba ATP Italian Open nung masayatsü atema telemetba agiba Hokolbarnü metetdaksüogo. Pa teka tachichilen maneni tashiba aliba ajanga iba jenjang agi. Pa kasa timtem ajanga Monte Carlo aser Barcelona na nunga masayai liasü.

Küm nung tanabuba Grand Slam; French Open asayatsü

hopta asem dang anunga lia tang pa temang nung timtem adokogo.

"Madrid nung asayaba sülen teka nung tashiba ka ajangshi aser minpronga liasü," ta Spain nunger asayar yagi X sabang ajanga lemsatep.

"Tia maka ni Rome nung masayatetsü. Ni tashiba kecha makai asayatetsü atema anisüngzüksü nungdaker," ta pai ashi.

Madrid Open nung Alcaraz asaya 14 tashi khi danga

tamakok mongui asaya liasü, ajisüaka pa quarter-finals nung Andrey Rublev-i 4-6, 6-3, 6-2 agi koka liasü.

Pa Mongolbarnü taoba küm Madrid Open runner-up Jan-Lennard Struff den ghonda asem shi asaya aser Rublev den asayaba mapang iba ajanga tetsükdaksü adoka liasü.

"Ni forehand agi ball azükba shia teka nung tashiba ali mali iba indang bilema asaya liasü," ta Alcaraz-i Bodhbarnü asaya tembangba sülen ashi.

"Ni tashiba kecha melei aser teka nung tashiba indang kecha mebelemi Rome nung oa asayatsü süra anogo ishika tsüngda kanga meranga inyaksüsa akümtsü, ajisüaka atasa-a meylongi inyaksüsa akümtsü," ta pai shia liasü.

Alcaraz-isa, pa Rublev den asayaba mapang asaya tatemibo timtema asayaogo aser teka anisüngzüksütsü atema tashi agi mezüki slice süa dang asaya liasü, ta ashi.

French Open koba clay court nung asayaba Grand Slam lir, iba asayamung ya May 26 nü tenzüksü. Taoba küm iba asayamung nung Alcaraz semifinal tonga asaya liasü.

Taoba mapang NZ nunger asayar Anderson USA tenüng nungi asayatsü

Monupii/May 4, 2024 (Agencies): Taoba mapang New Zealand nunger all-rounder Corey Anderson T20 World Cup atema United States team nung züngoksemogo.

Arishi küm 33 tain asayar ya taoba ita mezüngbuba USA team nungi asaya liasü. Pa NZ toktsür US-i aoba sülen World Cup ayongzüka asayaba linük tenüng nungi asayatsü atema temsüa küma liasü.

Anderson-i 2012 nungi 2018 küm tashi nung New Zealand tenüng nungi 93 ben asayaogo,

kong World Cup asem densema lir.

Linük ana tenüng nungi tebur T20 cricket asayaba asayar 19 rongnung pa-a ka lir.

Team-mate Nitish Kumar, shiba World Cup team nung züngoksemogo, pa-a taküm USA nungi masaya tsüngda Canada tenüng nungi T20 18 nung asayaogo.

Taküm World Cup nung USA team India, Pakistan, Ireland aser Canada den ata lir.

US kübok New York, Dallas aser Lauderhill nung World Cup asayatem ayongzüka asayatsü

asayatem Caribbean nung asayatsü.

World Cup atema USA team:

Monank Patel (captain), Aaron Jones (vice-captain), Steven Taylor, Corey Anderson, Saurabh Netravalkar, Jessy Singh, Harmeet Singh, Noshtush Kenjige, Shadley Van Schalkwyk, Nitish Kumar, Andries Gous, Shayan Jahangir, Ali Khan, Nisarg Patel, Milind Kumar. Reserves: Gajanand Singh, Juanoy Drysdale, Yasir Mohammad.

Asian Ju-Jitsu championship atema Arunachal nungi asayar 10 shimogo



Itanagar, Monupii/May 4 (Agencies): Ju-Jitsu Association of India-i, 8buba Asian Ju-Jitsu Championship-2024 nung linük tenüng nungi asayatsü atema Arunachal Pradesh nungi asayar 10 shimogo.

Iba asayamung ya Abu Dhabi, UAE nung tang tasayadak lir.

Asayamung ya May 1 nü

tenzükgogo aser May 8 nü tashi asayatsü, kong Asia nung asayar tajungtibatem jenjang balala nung toktepdar.

India team nungi mezüngbuba telokbo Abu Dhabi tongaogo, kong senior asaya aser coach tem densema lir.

Arunachal Ju-Jitsu Association general secretary Langkung Tatu-i ashiba agi, tanabuba telok kong junior

asayatem densema lir, parnok Abu Dhabi yakta tonga aotsü imlar.

Arunachal Pradesh nungi asayatem rongnung Gichek Bhai, Langkung Rade, Tap Menia, Dongda Taruk, Sangha Tader, Byabang Bhupai, Langkung Adam, Langkung Duta, Langkung Meying, aser Nangbia Tader nunger densema lir.

Monupii/May 4, 2024 (Agencies): Uefa-i sangdong ka ajanga, taküm Germany nung asayatsü aliba European Championship atema linük team shia nung asayar 26 züngoksemsü atema melatsü, ta metetdaksüogo.

European governing body indang executive committee-i, asayar 23 nungi 26 kümtsüba sangdongogo. National competitions committee-i April ita temelenshi pusema vote agütsüba sülen iba jenjang agiogo.

Euro 2020 asayaba mapang Covid-19 wara pokteter aliba ajanga team ajak nem asayar 26 shimtsü atema temelaba agüja liasü, saka Uefa-i mezüngbo Euro 2024 nungbo taoba mapang ama asayar 23 dang shimdaksütsü sentong liasü.

Kasa mapang nung Qatar nung 2022 küm asayaba World Cup nunga asayar 26 shimtsü asoshi temelaba agütsüogo, kechiyong iba WC ya domestic season teyongtsü nung asaya liasü.

Asayamung nung shilem agitsü aliba team temi asayar talilattem tenüng benoktsü nungdak madoker, ajisüaka asayar 23 tenüngbo June 7 nü tashi nungbo benoktsüla.

Iba osang ya international manager tem aikati pelashishia agizükogo, shirnoki asayamung atema asayar tajemba kümdaksüba ashishia liasü aser Netherlands boss Ronald Koeman-ibo iba ya tim masü ta shia liasü.

England manager Gareth Southgate-i mezüngbo asayar 23 dang asaydaksütsü atema pusema liasü, saka tang asaya aliba Premier League nung asayatem aika yiruba sülen paia pa tebilemba melenshiogo.

Premier League season tembangba sülen anogo ana lir May 21 nü pai England team sangdongtsü.

Euro 2024 ya June 14 nü tenzüksü aser mezüngbuba asaya Scotland aser Germany na asayatsü. Kasa mapang nung England team June 16 nü mezüngbuba Serbia den asayatsü.

Senior Men's Inter-District OD asayamungosang

Dimapur, Monupii/May 4 (TYO): Senior Men's Inter-District One Day Tournament 2024 Nagaland Cricket Stadium aser Sovima Cricket Ground nung kanga toktepdar asayadaki.

Honibarnü Nagaland Cricket Stadium nung Dimapur team-i wicket 8 agi Kohima kokogo. Player of the Match, Sanjay Shiva-i bowling kanga junga ona wicket 5 agi aser Kohima nem run 98 dang yangludaksü. Dimapur team batting amenba mapang parnoki run ayong ayonga menep aser parnok rongnungi Joshua Ben Ozukum-i out mesüi run 59 yanglua liasü.

Kasa mapang nung Sovima Cricket Ground nung Chümoukedima-i wicket 7 agi Wokha kokogo. Chümoukedima team nungi asayar Jonathan Rongsen-i run 64 yanglua par team ani aser Wokha team-i run 155 yanglur aliba menepa liasü.

Venue: Nagaland Cricket Stadium

Kohima vs Dimapur Kohima Over 38.1 nung 98/10 (Imomenba 20(75), Sanjay 5/30, Hem 3/18)

Dimapur: Over 13.2 nung 99/2 (Joshua Ben Ozukum 59*(34), Kelhousilie 1/18)

Result: Dimapur-i wicket 8 agi asaya akok.



Player of the Match: Sanjay Shiva 5 wickets; run 30.

Venue: Sovima Cricket Ground

Wokha vs Chümoukedima Wokha Over 50 nung 155/9 (Nchumbemo Humtsoe 58(95), Neizekho Rupreo 2/22)

Chümoukedima: Over 28.5 nung 158/3 in 28.5 (Jonathan Rongsen 64(60), Sede 63*(77), C Abemo Kikon 1/17)

Result: Chümoukedima-i wicket 7 agi asaya akok.

Player of the Match: Jonathan Rongsen 64 of 60 balls.

Senior Men's Inter-District One Day Tournament 2024 nung Group A nungi Dimapur aser Kohima na aser Group B nungi Niuland aser Chümoukedima na semifinal atema qualify süogo.

BILEMDANGANG

"Nü inyakyim tem raksatsütsü asoshi masü saka temelenshi asoshi süang."